

Headlines

- प्रधानमंत्री नरेन्द्र मोदी होर अत्तरू 13 जनवरी गी सोनामर्ग सुरंग दा उदघाटन करगंन जेह्दे नै जम्मू कश्मीर च हर मौसम दरान सड़क संपर्क च बेह्तरी औग।
- केन्द्री गृहमंत्री अमित शाह होर मुल्खै च नशाखोरी ते नशीले पद्धार्थे दे कारोबार पर रोक लाने लेई केन्द्र ते राज्ये बश्कार नेड़मे तालेमल कन्नै सख्त गैही पुट्टने पर जोर दित्ता ऐ।
- डोडा जिले च आतंकी संगठनें शा बाहर रेहियै उंदे लेई कम्म करने आले 5 ओवर ग्राउंड वर्करें खलाफ चार्जशीट दाखल कीती गई ऐ।
- ग्रामीण विकास मंत्री जावेद अहमद डार होरें आखेआ ऐ जे हिमायत स्कीम जम्मू कश्मीर दे टकोह्दा करियै ग्रामीण नोजवानें दे समाजी आर्थिक स्तरे गी उबड़ा चुक्कने च मती महत्वै आली भूमका नभा करदी ऐ।
- 5 जम्मू कश्मीर विधानसभा लेई पमें चुनोए दे विधायकें गी सदन दी कारवाई तौर तरीके, प्रक्रियाएं ते नियमें दे बारे च वाकफ ते जागरूक कराने लेई लोआया गेदा त्रै रोजा ओरिएंटेशन प्रोग्राम अज्ज सम्पन्न होई गेआ।

<><><><><><>

PM Sonamard Tunnel

जम्मू कश्मीर दे पूरे पराते विकास गी दिक्खदे होई प्रधानमंत्री नरेन्द्र मोदी होर औंदी 13 जनवरी गी रणनीतिक तौरा उपपर महत्वपूर्ण 6.4 किलोमीटर लम्मी सोनामर्ग सुरंग दा उदघाटन करगंन। प्रधानमंत्री हुंदे दौरे शा पैह्ले इलाके च सुरक्षा दे निगगर बंदोबस्त कीते गेदे न तां जे कार्यक्रम गी सुरक्षत ते सुचारू ढंगै कन्नै जकीनी बनाया जाई सकै। 2 ज्हार 100 करोड़ रपे दी लागत आली एह परियोजना श्रीनगर ते सोनामर्ग बश्कार हर मोसम च संपर्क दी सुविधा प्रदान करोग, जेह्दे राएं मकामी बपार ते सैलसफा गी बढ़ावा थ्होग। एह सुरंग श्रीनगर ते लेह बश्कार दे छिंडे गी बी घट्ट करोग जेह्दे करी मकामी बुनियादी ढांचे दा बी विकास होग।

<><><><><><>

Shah Drug

केन्द्रीय गृहमंत्री अमित शाह होरें अज्ज मुल्ख च नशे दी कबैतु शा छुटकारा पाने लेई केन्द्र ते राज्य सरकारें गी आपसी तालमेल बनाइयै कम्म करने दी जरूरत उपपर जोर दित्ता ऐ। उनें अज्ज नमीं दिल्ली च नशीले पद्धार्थे दी तस्करी ते राश्ट्री सुरक्षा उपपर सरबंधत क्षेत्रीय सम्मेलन दरान एह गल्ल आक्खी। कार्यक्रम दरान गृहमंत्री होरें अज्ज थमां शुरू होआ'रदे नशीले पद्धार्थे गी खत्म करने सरबंधी पखवाड़े दा बी उदघाटन कीता जेह्ड़ा इस म्हीने

दी 25 तरीक गी सम्पन्न होई जाग। कार्यक्रम दरान 44 जहार किलोग्राम शा मते नशीले पदार्थ जेहदी अंतराष्ट्रीय बजार च कीमत 1 जहार 411 करोड़ रपे ऐ, गी नश्ट कीता जाग। केन्द्री गृहमंत्री होरें सब्बने राज्यें ते केन्द्र शासत प्रदेशें च मानस-2 हैलपलाइन दे विस्तार दा बी उद्घाटन कीता। इस दरान बोलदे होई गृहमंत्री होरें गलाया..... बाईट तोआई जम्मू कश्मीर दे उपराज्यपाल मनोज सिन्हा ते मुख्मंत्री उमर अब्दुल्ला होरें गी अज्ज दे इस सम्मेलन च वर्चुअल ढंगा कन्नै हिस्सा लैता। सम्मेलन च नशीले पदार्थें दी तस्करी दे बधा'रदे मुद्दें उप्पर ध्यान केन्द्रित कीता गेआ ते एहदे कन्नै निबड़ने लेई आपसी तालमेल बनाइयै कम्म करने दी जरूरत उप्पर बी जोर दित्ता गेआ।

<><><><><><>

Doda Chargesheet

आतंकवाद पर रोक लाने लेई जारी कारवाइएँ दे हिस्से दे तौर पर डोडा पुलसै आतंकी संगठनें कोला बाहर रेइयै कम्म करने आले ओवर ग्राउंड वर्करें खलाफ कारवाइयां तेज करी दित्तियां न जेहड़े पिच्छे जनेह सुरक्षा बलें पर होए दे हमले च शामिल आतंकवादिएं गी समर्थन दिंदे आए हे। पुलसै ऐसे 5 लोकें खलाफ चार्ज शीट दाखल कीती ऐ जेहड़े जम्मू कश्मीर दे डोडा जिले आतंकवादिएं गी रूट्टी ते होर दुआ जरूरी समेयान उपलब्ध करांदे हे। आकाशवाणी दे डोडा आले जिला संवाददाता नै जानकारी दित्ती ऐ जे इनें लोकें खलाफ गैर कनूनी गतिविधिएं पर रोक लाने सरबन्धी यूटपीए कनून तैहत मामला दर्ज कीता ऐ। पुलसै दे एसएसपी संदीप मेहता होरें जानकारी दित्ती ऐ जे खित्ते च आतंकवादिएं गी समर्थन देने आले लोकें दे तंत्र गी खत्म करने लेई कारवाइयां तेज करी दित्ती दियां न।

<><><><><><>

DIG-R-Day

जम्मू कश्मीर च औंदे गणतंत्र दिवस गी ध्याना च रखदे होई सुरक्षा दे सख्त बंदोबस्त कीते गेदे न। जम्मू-सांबा-कठुआ रेंज दे डीआईजी शिव कुमार शर्मा होरें गलाया ऐ जे सुरक्षा बल आपसी तालमेल बनाइयै कम्म करा'रदे न तां जे कार्यक्रम गी शांतिपूर्ण ते सुचारू ढंगा कन्नै तोड़ चाढ़ेआ जाई सकै। मीडिया कन्नै गल्ल करदे होई डीआईजी शिव कुमार शर्मा होरें आखेआ

<><><><><><>

Himayat Javed Dar

राई-बाई ग्रामीण विकास मंत्री जावेद अहमद डार होरें जम्मू कश्मीर च नोजवानें गी कम्म रोजगार उपलब्ध कराने च "हिमायत" स्कीम दे सकारात्मक ते दिल बधाने आले असर दी सराहना कीती। रिमायत स्कीम दी अलुमिनी मीट गी संबोधत करदे होई उनें नोजवानें गी बक्ख-बक्ख क्षेत्रें च रोजगार हासल करने दे काबल बनाने च इस स्कीम दी भूमिका गी बी उजागर कीता। मंत्री होरें सब्बने जिला अफसरें गी जोर देइयै आखेआ जे ओह मते शा मते

नोजवानें गी इस स्कीम दे बारे च जागरूक करना जकीनी बनान, टकोहदा करियै ग्रामीण इलाकें दे नोजवानें गी। उनें आखेआ जे इस स्कीम दी कामयाब अमलावरी जम्मू कश्मीर दे ग्रामीण इलाकें दे नोजवानें दे समाजी आर्थिक स्तरै गी उबड़ा चुक्कने च इक महत्वपूर्ण भूमका नभा करदी ऐ। इस मौके सचिव रचना शर्मा होरें हिमायत स्कीम दी कामयाबी दा जिक्र करदे होई दस्सेआ जे 34 जहार कोला मते नोजवानें गी बक्ख—बक्ख शोबें च सिखलाई दित्ती गई ऐ ते 14 जहार कोला मते गी बक्ख—बक्ख क्षेत्र च नौकरी बी थोई गेदी ऐ ते इंदे चा मते सारें गी ना छड़ा जम्मू कश्मीर ते मुल्खै दे बाकी हिस्सें च सगुआं अंतराष्ट्रीय स्तरै पर बी कम्म करने दे मौके हासल होआ करदे न।

<><><><><><>

Forest Clearness Rana

जंगलात ते पर्यावरण मंत्री जावेद अहमद राणा होरें जम्मू कश्मीर च विकासशील परियोजनाएं लेई जंगलात दी मंजूरी देइ दित्ती ऐ। इनें परियोजनाएं च पानी दिएं सप्लाई सरबंधी स्कीमां, बबेटी च 4^{जी} दी पुज्जत यब्बनें तगर पजाने सरबंधी परियोजना, डुलहस्ती शा किशनपुर 400 के.वी. दी क्षमता आली ट्रांसमिशन लाईन गी नमें कसरेया विकसित करने सरबंधी परियोजना शामिल न। मंत्री होरें सरकार दे बुनियादी ढांचे दे विकास दी वचनबद्धता गी इक बारी फही पक्का करदे होई मते शा मते रूक्ख बूहटे लाने दी जरूरत उप्पर बी जोर दित्ता।

<><><><><><>

JK MLA

जम्मू कश्मीर विधानसभा लेई नमें चुनोए दे विधायकें लेई त्रै रोजा सिखलाई कैप अज्ज सम्पन्न होई गेआ जिस दुरान इनें सदस्येग ी विधानसभा दी कारवाई, संचालन, नियमें, तौर तरीकें ते प्रक्रियाएं दे बारे च जानकारी देइयै वाकफ कराया गेआ टकोहदा करियै उनेंगी जेह्दे पैहली बारी विधानसभा लेई चुने गे न। त्रै रोजा इस कार्यक्रम दे खीरी ध्याड़े अज्ज उनेंगी संसदीय परम्पराएं, रिवायतें ते व्यवहार नियमें दे बारे च दस्सेआ गेआ, इस सत्र दी सदरत जिनें माहिरें कीती उंदे च डॉ. सत्यपाल सिंह ते पी.के.मलिक शामिल हे। आकाशवाणी दे जम्मू आले जिला संवाददाता अंकुश शर्मा नै दस्सेआ जे इस दुरान राष्ट्रीय ई—विधान ऐप दे बारे च इक विशेष सत्र गी लोआया गेआ जेह्दे च विधानिक कुशलता च डिजीटल उपकरणें दे महत्व पर लोह पाई गई।

<><><><><><>

Rajouri Mission Yuva

जिला प्रशासन राजौरी आस्सेआ मिशन युवा तैहत अज्ज पंचैत ढांगरी ते गुनी च विशेष जागरूकता कैप दा सरिस्ता कीता गेआ। कैप आयोजित करने दा मकसद मकामी लोकें गी सरकार आस्सेआ उंदिएं आसें तांगें गी पूरा करने लेई ते कन्नै उनेंगी अपनी सतह पर कम्म रोजगार दे मौके उपलब्ध कराने दे कार्यक्रमें ते स्कीमें दे बारे च जागरूक बनाना ऐ। साढ़े जिला संवाददाता शक्तिपाल नै जानकारी दित्ती जे इस मौके मिशन युवा दे नोडल

अफसर बलवीर शर्मा होरें नोजवानें गी जोर देइयै आखेआ ते ओह सरकार आस्सेआ शुरू कीती गेदिएं स्कीमें थमां लाह ठोआने, स्कीमें दी मदद कन्नै अपना कम्म रोजगार शुरू करन ते कम्म तुप्पने दे बजाए होरने गी कम्म देने आले बनन। साढ़े जिला संवाददाता कन्नै इस बारे च गल्ल करदे होई बलवीर सिंह होरें आखेआ

<><><><><><>

Weather

मौसम विभाग नै 12 थमां 14 जनवरी तगर मौसम दे खुश्क ते बदलोखड़े रौहने दी पेशगोई कीती ऐ। यात्रुएं गी राश्ट्रीसय जरनैली शिड़क उप्पर दिन दे समें च यात्रा करने दी सलाह तारी कीती गई ऐ। उआं जम्मू कश्मीर राश्ट्री जरनैली शिड़क उप्पर दवै बक्खिएं गड्डिएं दी आओजाई अजें जारी ऐ। तोआई मुगल शिड़क जेहड़ी राजौरी ते पुंछ गी शोपियां जिले कन्नै जोड़दी ऐ। पिछले 15 दिनें थमां बर्फ गी हटाने दे कम्म दे चलदे अजें बंद पेदी ऐ। अज्ज जम्मू दा बद्धोबद्ध तापमान 16.2 डिग्री सैल्सियस ते घट्टोघट्ट तापमान 7.1 डिग्री सैल्सियस दर्ज कीता गेआ ऐ।

<><><><><><>